

# TUSI TAIALA

---

**MO LE PULEA MA LE VA'AIA LELEI O I'A MA FIGOTA**

---

**O LE AFIO'AGA O**

**PU'APU'A**

**Aso 18 Mati, 1997**

**SAUNIA:**

Pule mamalu a Alii ma Faipule ma tagatanuu o le Afioga o Pu'apu'a, ma le Lagolagosua a le Vaega o Faigafaiva o le Matagaluega o Faatoaga ma Faigafaiva.

**FAASOLOGA**

## 1. UPU TOMUA

O faigafaiva i Samoa e taua tele aua o se tasi lea o auala e maua ai le fofoga taumafa, aemaise lava i alalafaga ma afioaga i tua. O le tele o afioaga latou te le o faatauaina le vaaia lelei o le tamaoaiga ma le siosiomaga o le gataifale. O le faia ma le faaaogaina o ituaiga faigafaiva faa-ona-po-nei, e iai mea manava, upega ma tili mataninii, ma vailaau oona, e faamata faigofie ma tele i'a maua, ae e ogaoga lo latou faaleagaina o le siosiomaga o le gataifale ma ona tamaoaiga. O le faatinoina foi o atinae i luga o le gatifale, ua faaleagaina ai le tele o nofoaga mo i'a ma figota, aemaise le miliona o meaola o le gataifale.4296

O le polokalame o le faasaoina o le gataifale, na amata mai e le Ofisa o Faigafaiva i le tausaga e 1995. O le faamoemoe o le polokalame, ina ia tapu'e mai le tamaoaiga o le gataifale, ma pui puia ai le siosiomaga. O tualumaga o le polokalame, e aofia ai le soalaupuleina ma le fausiaina o se Tusi Taiala. O lenei Tusi Taiala, o loo tamauina ai fuafuaga faataatitia a le Afioaga ma le Ofisa o Faigafaiva. o nei fuafuaga faataatitia e una'ia ai le pulea lelei ma fuafua tatau o le faaaogaina o le tamaoaiga o le gataifale o Pu'apu'a.

## 2. FAAMATALAGA E UIGA I LE AFIOAGA

### FAALAUATELE

Faamatalaga	Aofaiga
O le faitau aofai o tagata o lenei alalafaga	Sili alu i le 700
O le aofai o a'oga i totonu o lenei Afio'aga : Tulagalua : Junior High	1 1
O le aofai o Falesa i totonu o le Afio'aga : Ekalesia Mamona : Ekalesia Katoliko : Ekalesia Aso Fitu : Ekalesia Metotisi : Ekalesi Baha'i : E.F.K.S	1 1 1 1 1 1
O le umi o le a'au o le Afio'aga	10 kilomita
O le mamao o le a'au mai le matafaga	80 mita
O le loloto (futu) o vaega e aupito sili ona loloto o le aloalo pe a pe le tai i le taimi nei	6 - 7 futu
O le loloto (futu) o vaega e aupito sili ona loloto o le aloalo pe a pe le tai i le taimi ae lei afaina i afa	10 futu

### FAIGAFIIV A

Faamatalaga	Aofaiga
O le faitau aofai o tamaloloa faifaiva e fagogota i le sili atu ma le tasi le aso i le vaiaso.	Sili atu i le 100
O le faitau aofai o fafine faifaiva e fagogota i le sili atu ma le tasi le aso i le vaiaso	80
O le aofaiga o tagata e fagogota i tuā'au mai le tasi le aso i le vaiaso	21 - 25
O le aofaiga o paopao e faaaogaina mo faigafaiva i totonu o le Afio'aga nei	52

O le aofaiga o alia fagota o loo faaoga mo faigafaiva a le Afio'aga nei	0
E faatagaina ni tagata fagogota mai nisi alalafaga e fagogota i lo outou gataifale?	Leai

Ituaiga I'a / Figota	Ituaiga Faigafaiva	Taimi faaalu mo le tasi le tau'i'a / 10 i'a / ofu	
		Taimi nei	I 10 tausaga ua te'a
<b>I'a maua soo se 5</b>			
1. Mataleele	Matu (po)	1 itula	30 minute
2. Anae	Upega	15 minute	5 minute
3. Fuga	Upega	1 itula	30 minute
4. Pone	Matatao	30 minute	15 minute
5. aAogo	Matatao	30 minute	15 minute
<b>Figota maua soo se 3</b>			
1. Lumane	Aoina	1 itula & 30 minute	1 itula
2. Ali'ao	Aoina	2 itula	30 minute
3. Alili	Aoina	1 itula	30 minute

Isi Faigafaiva	Isi Taumafa o le Sami	Taimi Faaalu mo le 10 mea ua ta'ua
Seuseu	Tuitui	E sili atu ma le 1 le itula
Amoamoga	Faisua	1 itula
Lauloa	Ula	2 itula
Afa loloa	Pa'a	2 itula
Ofe vili	Sea	10 itula
	Laumei (tasi)	Seiloga e va'aia

#### VAEGA TAUA O LE SIOSIOMAGA MO FAIGAFAlVA

VAEGA	VAEGA TAUA (sikuea mita)	
	Taimi nei Sefulu	I Tausaga ua te'a
Togatogo	E itiitii ifo ma le 100 sikuea mita	400 - 500 sikuea mita
Amu	400 – 500 sikuea mita	E sili atu i le 700 sikuea mita
Vaovao o le Sami	300 – 400 sikuea mita	600 – 700 sikuea mita

### 3. O LENEI FUAFUAG TATAU

#### 3.1 Autu

O lenei fuafuaga ua ta'ua ai ni faatinoga e manaomia ina ia maua ai sona taunuuga maumuatutu. O le faamoemoe maualuga o le Malo, ina ia faatupula'ia atili le tamaoaiga ma le fofoga taumafa mai le sami, faapea ai le soifua maloloina ma le manuia o tagata o le afioaga i le lumanai. O lea e manaomia i tagata uma ina ia avea nei faatinoga e puipuia ai le siosiomaga o le gataifale ma ia fuafua tatau ai le soona fagotaina o i'a ma figota. O nei fuafuaga na faaalua e le Komiti Faufautua o le Va'aia Lelei o i'a ma figota (KFVL) o le afioaga e avea ma autu.

**"Ina ia puipuia le siosiomaga o le gataifale ma le toe faatupulaia o i'a ma figota mo tupulaga o le lumanai"**

Ua ioeina e le fonotaga a le Komiti (KFVL) i le Aso 10 o Aperila, 1997, o le Fono a Alii ma Faipule latou te faamalosiā ma una'ia vaega eseese uma o le Afio'aga aua le puipuia ma le faasaoina o atinae ma alamanuia o le gataifale o Pu'apu'a. O le Komiti foi sa gafa ma le tapenaga o tulafono aemaise o vaega uma tatau ma le Afioaga e pei ona ta'ua i luga (Autu). O le tele foi o lenei tapenaga, o le a tuuina atu i le pule mamalu a Alii ma Faipule mo le pasiaina. O lenei fuafuaga ua faamoemoe ina ia o'atu i le tolu tausaga o loo faaogaina pea, ae peitai, afai ae iai se suiga, ua ao loa ona toe susesueina lenei fuafuaga.

### **3.2 Tapenaga**

O lenei tapenaga sa saunia lava e le mamalu o le afioaga o Pu'apu'a, faatasi ai ma ni fautuaga auiliili, ma le lagolagosua a le Ofisa o Faigafaiva, o le Matagluega o Faatoaga ma Faigafaiva. O se oototoga la lenei o le tapenaga o le Pulega o le Siosiomaga o le Gataifale ma le Va'aia Lelei o i'a ma figota.

**Feiloaiga Muamua :** O lenei feiloaiga muamua sa faafesoota'ia lea e Loimata Leena, o le Ofisa o Faigafaiva ma Totive Aloaina, i le Aso 10 o Fepuari, 1997, ona o se talosaga mai le afioaga mo se fesoasoani mo lo latou gataifale.

**Fono Muamua :** O le tauaofiaga o le fono tele a le afioaga i le Aso 7 o Mati 1997, na taliaina aloa'ia ai lenei polokalame, ma sa vaevaeina ai loa le mamalu o le afioaga i ni vaega se tolu.

**Vaevaeina i Vaega :** O vaega sa vaevaeina iai, e aofia ai Matai, Aumaga, ma le Komiti a Tina ma Tama'ita'i. sa feiloai nei vaega eseese ma sui o le Ofisa o Faigafaiva, ma faatalatalanoaina ai faafitauli o le gataifale o loo alia'e i le Afioaga, atoa ai ma ni tali talafeagai e fo'ia ai nei faafitauli.

**Komiti Faufautua mo le Va'aia Lelei o I'a ma Figota :** I lenei Komiti, o loo aofia ai sui e toatolu sa filifili mai i vaega a Matai, toatolu mai le komiti a Tina ma Tamaitai, ma le toatolu mai le vaega a Aumaga, atoa ai ma le Pulenuu. O le Komiti la lenei sa latou tuufaatasia faamaumauga ma faamatalaga mai i nei vaega taitasi ma sa mafai ai ona latou tapenaina se ata faataitai o le Pulega o le Siosiomaga o le Gataifale ma le Va'aia Lelei o i'a ma figota. O lenei fuafuaga o loo aafia ai lagona o tagata o le Afioaga i le puleaina o faigafaiva talafeagai ma le siosiomaga o lo latou lava gataifale.

**Tauaofiaga o le Fono Mulimuli :** O le a tauaofia lenei fono i le Aso 18 o Aperila, 1997, mo le taliaina o le tusi taiala a le afioaga o Pu'apu'a.

## **4. TULAFONO FAALE-NUU I ASO UA MAVAE MA ASO NEI**

O le tele o tulafono i Aso ua tuana'i, o loo faaauau ona faaogaina pea i aso nei. O nei tulafono, e aofia ai: fanai'a, ava niukini ma le vailaau oona. O nei tulafono sa leai se faamalumaluga mai le Malo ma sona faamalosi.

- Talu ai ona o nisi o tagata o lo’o mafaufau mo le taimi nei ae le o mafaufau i le taimi o i luma faapea foi ma le lumanai manuia o tupulaga.

O le faaaogaina o fanai’a ma vailaau oona, o isi o faigafaiva le talafeagai mo fagotaga ua faasaina i Pu’apu’a, peitai e iai nisi o tulafono ua maea ona faasalalauina i le leitio (2AP), i aso ia mavae, a ua iai nei se suiga ona o ni mafuaaga tatau.

O nei mafuaaga, e aofia ai le faamalositia lea o nei tulafono mo afioaga tuaoi ma tagata uma ina ia taofia le toe solia o nei tulafono a le afioaga. Sa iai foi tulafono a le afioaga, e faasaina ai le toe aveesea o soo se maa poo oneone mai i le gataifale o le afioaga.

O nei tulafono o loo faamamaluina ma amana’iaina e pei ona sa iai i taimi ua muamua, faatoa faamamaluina ai i totonu o le afioaga o Pu’apu’a. Ae peitai, e le o mamalu i nei vaitaimi, ona o le le amana’iaina e isi Afioaga o tulafono a Pu’apu’a. Ae o le a faamamaluina pe a maea le fono tele i le Aso 18 o Aperila, 1997.

O nei mafuaaga uma, o loo aafia i le Fuafuaga mo le Pulega o le Siosiomaga o le Gataifale ma le Va’aia Lelei o i’a ma figota o Pu’apu’a.

E le gafatia na o le malosia faaletulafono a le Malo ona malu puipuia ai le siosiomaga o le gataifale ma ona tamaoiga. E utiuti tulaga tau tupe ma toagaogao foi le aufaigaluega a le Malo latou te faamalositia ma una’ia tulafono tau faigafaiva i nuu taitasi o Samoa i Sisifo. O le fofu talafeagai o loo i aao o tagata o loo soifua ma alaala i le Afioaga, faatasi ai ma le faamalumaluga a le Fono a Alii ma Faipule. O lenei tali, o le a le pine ona una’ia tagata latou te galulue faatasi ina ia malupuipuia ma faalelei le siosiomaga o le gataifale ma ona tamaoiga mo nei ma tupulaga o le lumanai.

## 5. FUAFUAGA FAATAATITIA

O fuafuaga faataatitia o ni gaoioiga ua faamoemoe e faaono fo’ia ai faafitauli ua faaalua ma faailoa mai e vaega eseese o le afioaga. E lua ituaiga fuafuaga faataatitia ua fuafuaina. O le fuafuga ua aupito sili ona taua, o fuafuaga faataatitia lea ua faaagaaga mo nuu ma afioaga. O le isi vaega o fuafuaga faataatitia, ua faamoemoe lea mo le ofisa o faigafaiva, ma o lenei fuafuga, o le a tuuina atu ai fautuaga ma fesoasoani, aua le tapueina o le faamoemoe e pei ona fuafuaina. O gaoioiga uma lava ua faamoemoe e faatino ai fuafuaga faataatitia mo le Ofisa o Faigafaiva, e ao ona faamaonia e le Faatonu Lagolago o le Vaega o Faigafaiva. O nei fuafuaga faataatitia uma ua faamoemoe lo latou faataunuuna i le lagolagosua mai o le Afio’aga ma ona tagatanuu. O fuafuaga faataatitia uma o le a fesoasoani ai le vaega o Faigafaiva, e ala atu i pepa o faamatalaga, faia o ni tautalaga i vaega eseese e pei o aoga ma faalapotopotoga faale-ekalesia, atoa ai ma le susesueina o tulaga eseese o le gataifale e talafeagai mo atinae.

Na faavae ma pasiaina e le fono i le Aso 15 o Aperila, 1997, ni tulafono e aiaia ai nisi o mataupu e pei ona taua :

- O faigafaiva le talafeagai. (ava niukini, fanai’a ma vailaau oon)

- Faaitiitia faigafaiva i le aloalo
- Faatafunaina o le gataifale
- Nisi o vaega faasaoina e pei o ogasami faasaoina, faa-faatoagaina o i'a o vai magalo ma figota i le sami

O se aotelega o nei fuafuaga faataatitia, na faapogai mai lea i faatalatalanoaga o faafitauli ma tali talafeagai i fonotaga a vaega eseese o le afio'aga. O nei fuafuaga faataatitia, ua aofia ai faatinoga ma tulafono e pei ona fautuaina e vaega eseese mo le fono mamalu a le Alii ma Faipule.

## **5.1 Ina ia faamalositia tulafono faale-nuu e faasaina ai faigafaiva e le talafeagai i Pu'apu'a**

### **Otootoga**

O nisi o faigafaiva ua mautinoa lo latou tulaga ogaoga i le faatama'iaina o le fogatai (amu) ma le tele o meaola o le gataifale, ma ose faataitiga o nei ituaiga o faigafaiva le talafeagai, e pei o le vaila'au ta-lavalava (chlorox), ava niukini, ma fanai'a. Ua le gata ina faatama'ia ai se vaega tele o le fogatai (amu), ae ua faapena foi ona faaumiumi se taimi e mafai ai ona toe faatupuina le tele o meaola o le gataifale ua aafia ma mamate i nei ituaiga faigafaiva e pei o na taua. A faaleagaina le fogatai, o lona uiga o le a faaitiitia i'a ma figota e toe maua ai.

### **Fuafuaga Faataatitia a le Afio'aga**

Ua molimauina e le afioaga le malu puipuia o pulega faale-nuu e aso nei. I le fonotaga i le Aso 3 o Aperila, 1997 a le Komiti (KFVL), na molimauina ai le toe faamalositia ma una'ia ai le Komiti ina ia toe faasalalauina ma faamautuina atili le tulafono ina ia malu puipuia ai le tulaga o atinae aemaise o ogasami faasaoina.

### **Fautuaga**

Ina ia faatumauina pea ma faamalositia tulafono o loo iai a le Afio'aga mo le faasaina o faigafaiva le talafeagai.

### **Tulafono**

"Ua matua faasaina lava faigafaiva le talafeagai e pei o fana'ia, ava niukini, vailaau oona, faamo'a poo sauega, ma nisi lava ituaiga, i le gataifale o le Afio'aga o Pu'apu'a"

### **Taimi Fautuaina**

Ina ia aloaia le faamamaluina ma le faamalositia o lenei tulafono pe a mavae le Fono tele e pasia i le Pulega o le Siosiomaga o le Gataifale ma le Va'aia Lelei o i'ama figota ia Aperila, 1997.

### **Faasalaga Fautuaina**

O faasalaga o loo iai nei mo soo se tagata o Pu'apu'a e maua ua ia solia le tulafono sa gafa lea ma le afio'aga lona aiaiga, o le faasalaga o loo iai nei, e 5 aumatua. A le usitaia e soo se tasi o le afio'aga, o le a faia loa iai se fuafuaga a le afio'aga, sei vagana ai tagata mai isi Afio'aga, o lo latou faasalaga, o le molia sao i le Tulafono a le Malo.

### **Fuafuaga Faataatitia a le Ofisa o Faigafaiva**

O le a fesoasoani le Ofisa o Faigafaiva mo le faatinoina o fuafuaga faataatitia a le Afio'aga e ala atu i lana polokalame fesoasoani faatasi ma le lagolagosua i faamatalaga ma fautuaga mo le faamautuina o nei fuafuaga.

## **5.2 Ia faasalalauina tulafono a le Afioaga**

### **Otootoga**

Ua fautuaina e le KFVL le faasalalauina o tulafono a le afio'aga, ua faamoemoe ma faaagaaga i le puipuiga o le siosiomaga o le gataifale ma ona tamaoaiga i faigafaiva. Sa iloiloaina foi e le Komiti, e ao ona toe faasalalauina tulafono, i aso ua mavae faatasi ai ma nisi o tulafono fou ina ia mafai ai ona maua le silafia faalauaitete o le atunuu ma tagata lautele e tusa o aiaiga uma o nei tulafono a le afioaga.

### **Fautuaga**

Ina ia silafia ai e le atunuu aemaise ai o Afio'aga tua'oi, ma ia faapea foi ona nofouta i ai e tusa o faasalaga ua aiaia e le afioaga o Pu'apu'a. Sa faatalosagaina ai foi e le komiti a le afio'aga se fesoasoani a le Ofisa o Faigafaiva mo le faasalalauina o latou tulafono ina ia faamalosia atili ai.

**Autu o le Faasalalauaga : "O le Puipuiga o le Gataifale o Pu'apu'a i lona lelei ma le toe faatupulaia o lona tamaoaiga o i'a ma figota"**

### **Taimi Fautuaina**

O le faasalalauina o tulafono uma atoa ma ona aiaiaiga, o le a faataunuuna pe a mae'a ona pasia e le Fono a Alii ma Faipule o le Afioaga i le Aso 18 o Aperila, 1997.

### **Fuafuaga Faataatitia a le Ofisa o Faigafaiva**

O le a fesoasoani le Ofisa i fuafuaga a le afio'aga e ala i le tapenaina o le latou tulafono atoa ai ma lona faasalalaina.

## **5.3 Tulafono e taofia ai le faatafunaina o le gataifale – lafoaiina o otaota i le sami ma matafaga**

### **Otootoga**

Ua pasiaina foi e le Komiti (KFVL), ina ia tuuina atu i le Komiti a Tina mo le va'aia lelei ma le faamamaina o le gataifale atoa ai ma le faamalosi o tulafono o loo iai, ae le gata foi i lea, ua aiaia foi e le Komiti a Tina faasalaga mo soo se tagata e faatafunaina le gataifale o le Afio'aga.

### **Fuafuaga Faataatitia a le Afio'aga**

O nisi o fuafuaga faataatitia a le Afio'aga, o le saunia lea e aiga taitasi o le afio'aga o ni lua e faaagaaga mo le lafoai iai o lapisi ma otaota e pei ona ta'ua

### **Tulafono**

"Ua matua faasaina lava ona toe lafoai lapisi ma otaota e pei o atigi-apa, fagu, uamea, pepa iila ma soo se isi lava ituaiga lapisi i le sami ma le matafaga o Pu'apu'a."

### **Faasalaga**

O le solia o lenei tulafono, o le faasalaga o soo se aiga e lafoaia otaota ma lapisi i le sami poo le matafaga foi, ua gafa lea ma le Komiti a Tina o Pu'apu'a, ae lagolagosua ai le pule mamalu a Alii ma Faipule o le afio'aga.

### **Fuafuaga Faataatitia a le Ofisa o Faigafaiva**

O le a fesoasoani le Ofisa o Faigafaiva mo le faatinoina o fuafuaga faataatitia a le Afio'aga, e ala atu i lana polokalame fesoasoani, faatasi ai ma le lagolagosua i faamatalaga ma fautuaga mo le faamautuina o nei fuafuaga.

## **5.4 Ia iloiloaina le tulaga talafeagai o le faasaoina o se vaega o le gataifale o le Afioaga**

### **Otootoga**



O se vaega o le gataifale ua faasaoina, e tatau ona le toe aafia lea i ni faigafaiva ma o le a avea o se ogasami faasaoina, e ao ona aafia ai le malu puipuia o le siosiomaga ma ona tamaoaiga (figota ma i'a). o lenei vaega faasao, o le a faasaoina ai amu, a'au, faapea foi i'a ma figota, ina ia mafai ona maua e nei meaola le avanoa e tautuufua ma fanafanau ai. O le autu taua lava, o le a avea lenei faasao ma puna'aga o i'a ma figota e mafai ai ona faaleleia nisi vaega o le gataifale ua afaina i faigafaiva le talafeagai, e iai ava niukini, fanai'a, soona fagotaina, ma isi. O le a fanafanau ma tautuufua ai i'a ma figota o loo aumau i le vaega faasaoina, ma tafea atu o latou fua fanau ma faatupula'ia ai meaola i nofoaga ua le maua ai ni i'a ma figota. O le a le pine ona manuia ai i tatou aemaise tupulaga i le lumana'i.

#### **Fuafuaga Faataatitia a le Afio'aga**

O le Afio'aga e ao ona :

- Galulue faatasi ma lagolagosua i le aufaigaluega a le Vaega o Faigafaiva i le fatinoina o le iloiloga o le tulaga talafeagai o se vaega o le gataifale o Pu'apu'a e avea ma vaega faasaoina.
- Talanoa ma auiliiliina se lipoti, ma ia faia iai se faaiuga i le faavaeina o le ogasami faasaoina.
- Ia faatinoina loa fuafuaga mo le faavaeina o le ogasami faasaoina e pei ona iloiloaina, tausiga ma le pulea lelei o se vaega o le a atofaina.

Ina ia faasalalauina i le ea se maliliega o le Afio'aga ua iai e faasaga i le ogasami faasaoina. O tagata fagogota uma e tatau ona taumamao mai le vaega o loo fagogota ai mai le ogasami faasaoina. Ua fuafuaina foi e le Komiti a le afio'aga le faia o ni pine se lua aua le faailogaina o le ogasami faasaoina ma le pine e faagata ai le au-fagogota mai le sopolia o le vaega faasaoina.

#### **Fautuaga**

Ina ia silafia ai e le atunuu aemaise ai o Afio'aga tua'oi, ma ia faapea foi ona nofouta iai e tusa o faasalaga ua aiaia e le afio'aga o Pu'apu'a. Sa faatalosagaina ai foi e le komiti a le afio'aga se fesoasoani a le Ofisa o Faigafaiva mo le faasalalauina o le latou tulafono, ina ia faamalosia atili ai.

#### **Tulafono**

"Ua matua faasaina lava soo se tasi mai nisi afio'aga ona toe fai ni faigafaiva ma soo se isi lava ituaiga o fagotaga i le gataifale o Pu'apu'a, i le vaega o le aloalo ia faasaoina ami Leato se'ia o'atu i Papalaulelei.

#### **Fuafuaga Faataatitia a le Ofisa o Faigafaiva**

O le Ofisa o Faigafaiva o le a :

- Faatinoina le suesuega o le tulaga o se vaega o le gataifale e avea ma vaega faasaoina, a'o le i maea le masina o Me, 1997.
- Saunia se lipotimo le tuuina aloa'ia atu i le Komiti o le Pulega o faigafaiva a le afio'aga male Fono.
- O le a tuuina atu ni fautuaga ma ni faamatalaga mo le tausiga, pulea ma le va'aia lelei o le vaega faasaoina o le gataifale o le Afio'aga.

### **5.5 Ia iloiloaina le tulaga talafeagai ma lelei o le gataifale mo le tufaina atu ma le faa-faatoagaina o i'a ma figota.**

## **Otootoga**

O le tufaina atu ua faatatau lea i le aumaia o ni figota poo ni i'a mai si isi atunuu ma tufa atu e faaola i se ogasami ua talafeagai. O le faa-faatoagaina ua faatatau lea i figota i se nofoaga ua saunia. O le tufaina atu ma le faa-faatoagaina, o nisi ia o auala faa-atinae mo le faatupuina o figota aua le fofoga taumafa o le Afio'aga. O nei auala faa-atinae e moomia ai lava le galulue filiga ma le faamaoni o le Afio'aga ina ia ausia se taunuuga lelei.

Na faatalosagaina foi e le KFVL le faia o se aoaoga ma le tuuina atu o ni faamatalaga mo le faaolaina-i-vai, o i'a i totonu o Pu'apu'a. O le a iloiloaina foi e le Ofisa o Faigafaiva le tulaga talafeagai o le faatinoina o lenei ituaiga o atinae i le Afio'aga. Ua le gata foi i lea, a ua faapena foi ona faatalosagaina nisi o ituaiga o figota pe mafai ona faaolaina i le gataifale o le Afio'aga, e pei o aliao, maso (mussel) ma tio poo tifa (oysters).

### **Faamatalaga Faaopoopo – Tufaina o Figota**

O le tufaina atu, ua faatatau lea i le aumaia o ni figota poo se ituaiga o figota mai se isi atunuu e faaolaina i se ogasami ua talafeagai lelei. O le tufaina o le figota o le aliao i le tele o atunuu o le Pasefika, ua mautinoa ai le tele o ni faamanuiaga na mafai ona seleseleina e nei atunuu. I Fiti, na mafai ona toomaga iai tagata i le aano o le aliao e avea ma meataumafa. O lona atigi, na mafai ona faatauina atu e gaosi ai faamau o ofu i fale gaosi mea. I le Atu Kuki, e tusa ma le 280 aliao na tufaina atu iai, ma na mafai ona maua mai ai se aofaiga e tusa ma le 200 tone o atigi aliao i le tausaga na faatauina ai i falgaosi faamau. I le 1990, na tufaina atu ai i sami o le motu o Namua i Aleipata le 40 aliao, ma e le o iloa tonu le tulaga ua oo ia nei aliao.

I le tele o vaega o aloalo ma a'au o Samoa i Sisifo, o loo maua ai figota e pei o le pae, asi ma le tugane. O nei figota, ua mautinoa lo latou faaitiitia talu ai o le fagotaina e tagata mo le fofoga taumafa, ae ua faapena foi ona faatama'iaina o latou nofoaga e afa ma matagi malolosi. I le tele o nofoaga, ua le toe maua ai ni figota, pau le faamoemoe, o le aumaia lea o ni figota mai isi atunuu ma tufaina atu iai aua le faaolaina i nei vaega o le gataifale.

### **Fuafuaga Faataatitia a le Afio'aga**

E ao i le Afio'aga ona :

- Galulue faatasi ma le afaigaluega a le Vaega o Faigafaiva i le faatinoga o le iloiloaga pe talafeagai ma lelei le gataifale o Pu'apu'a i le tufaina atu ma le faa-faatoagaina ai o figota (faisua) ma isi.
- Auiliiliina o le lipoti i sueusega o le gataifale, ma ia faia se faaiuga i le faatinoina o nei atinae o figota i totonu o Pu'apu'a.
- Galulue faatasi mo le leoleoina o nei atinae ma le vaaia o tagata o loo latou faatama'iaina ma solia tulafono e faatatau i nei atinae.
- Galulue faatasi ma le afaigaluega a le Vaega o Faigafaiva i le faatinoga o le iloiloaga pe talafeagai ma lelei le vai o loo iai nei i Pu'apu'a i le tufaina atu ma le faa-faatoagaina ai o tilapia.

### **Fuafuaga Faataatitia a le Ofisa o Faigafaiva**

O le Ofisa o Faigafaiva o le a :

- O le a tuuina ni fautuaga ma ni faamatalaga mo le tausiga o i'a vai e pei ona ta'ua i luga. O le a faia iai sailiiliga a le ofisa i le vaega o le vai e talafeagai mo ia atinae.
- Fesoasoani i le va'aia ma le mataituina o le sologa lelei o le tuputupu ae o i'a atinae, atoa ai ma i'a vai (tilapia) ua faatalosagaina.

## **5.6 Ia una'ia faigafaiva i tua'au ma aoaoga mo faigafaiva**

### **Otootoga**

E mafai ona faaleleia le tamaoaiga i i'a ma figota maua i luga o le a'au ma vaega o le gataifale ua faaleagaina pe afai ae faaititia le fagotaina o nei vaega o le gataifale, ia poo le una'ia o le tulaga tau faigafaiva i tua'au. O se tasi o auala e faaono faaleleia ai le tamaoaiga o le gataifale, o le fagotaina lea o ogasami o le gataifale e lei fagotaina lava, aemaise o tua'au mamao.

Ua iai le talitonuga i le Komiti, e ao ona una'ia ma faamalosia faigafaiva i tua'au, ina ia tuumamaina ai le fagotaina o i'a ma figota o le a'au ma le aloalo. Ua le gata foi i lea, ae o le a mafai ai ona toe faatupula'ia ma faaleleia le tamaoaiga o le tele o le vaega o le gataifale ua faaleagaina. Talu ai ona o le tele o nuu e leai ni vaa e talafeagai mo le fagotaina o tua'au, o lea ua taumafai ai le Ofisa o Faigafaiva e sailia ni vaa talafeagai mo lea faamoemoe i se tau taugofie, ae faatupeina lava e le Afio'aga.

### **Fuafuaga Faataatitia a le Afio'aga**

Ua faatalosagaina e le Afio'aga ni vaa-fagota se lua (2) e tusa lona umi ma le 15 futu, e ala atu lea i le Ofisa o Faigafaiva. O le faamoemoe o lenei vaa, o le va'aia lelei lea o le ogasami faasaoina ma tagata fagogota mai isi afio'aga o loo fagogota i totonu o Pu'apu'a, atoa ai ma le aoaoina o tagata o le afio'aga mo soo se faigafaiva i tua'au.

Ia talosagaina le Ofisa o Faigafaiva ina ia faatinoina se aoaoga i auala tau faigafaiva e aoaoina ai le autautai o le nuu ma ia faatautaia e se Alii Ofisa o Faigafaiva ua iai se tomai faapitoa tau faigafaiva.

**Faamatalaga Faaopopo – Vaa mo fagotaga i tua'au :** O le leai o ni vaa talafeagai mo fagotaga i tua'au, o le ala lea ua avea ma vaegase i le una'ia o faigafaiva i tua'au. E leai se vaa fagota e i le va o le alia ma le paopao, ma o se vaa i lea va ua talitonuina o le a talafeagai mo faigafaiva i tua'au. I sailiiliga a le Ofisa o Faigafaiva i se vaa talafeagai, ua filifilia ai le vaa e i le va o le 14 – 16ft, ma o ona tau e itiiti ifo o le \$10,000, tuufaaatasi iai ma lona afi. O lenei ituaiga vaa, e mafai ona faaauvaaina e ni tagata se toalua pe tolu foi, ma e mafai ona faaaogaina lenei vaa i faigafaiva i tua'au. O le a fesoasoani le Ofisa o Faigafaiva i aiga taitasi, i auala i mea tau nonogatupe, aua le faatauina o le vaa ma lona afi. O le a faiai foi ni aoaoga mo le saogalemu i luga o le sami, teuina ma le va'aia lelei o i'a, tausiga o vaa atoa ai ma le faiga o mea fagota.

### **Fuafuaga Faataatitia a le Ofisa o Faigafaiva**

O le a iloiloaina e le Ofisa o Faigafaiva manaoga i auala tu faigafaiva, e ao ona fesoasoani ai e aoaoina ai le mamalu o le autautai o le afio'aga. O itu taua o le a aafia i nei aoaoga, e pei o le teuina ma le va'aia lelei o i'a, saogalemu i luga o le sami, tausiga o afi o vaa, ma isi lava mataupu taua.

## **5.7 Faasaoina o togotogo**

### **Ootootoga**

O se tasi foi o itu taua ua maitauina, o le faatama'ia o togotogo o loo ola faataamilomilo i le auvai, ma ua avea lea o se auala e lepeti ai nofoaga sa masani ona tautuufua ai nisi o i'a e pei o le anae. Ua mautinoa foi o afa e lua ua mavae, o se tasi lea o mafua'aga atoa ai ma le tagata soifua, ua faaopoopo iai ma le taina i lalo o fafie ma le faaogaina i le ua mo galuega taulima a tina, ua avea lea ma itu e faaititia ai ma faasolo ina mou atu.

### **Fuafuaga Faataatitia a le Afio'aga**

Ua fautuaina e le Komiti (KFVL) le taofia ma le faasaina o le taina i lalo o togotogo o loo ola faataamilo i auvai ma le gataifale o Pu'apu'a.

### **Fautuaga**

Ua fautuaina e le Komiti a le afio'aga le toe faasaoina uma o togotogo o loo totoe nei i totonu o le afio'aga, aua le lumana'i ina ia mafai ai ona toe faafoisia le olaola lelei o togotogo epei ona iai i aso ua mavae.

### **Fuafuaga Faataatitia a le Ofisa o Faigafaiva**

O se lagolagosua mai le Ofisa o Faigafaiva e ala lea i lana Polokalame fesoasoani o le tuuina atu lea o ni fautuaga e saga faamautuina ai ma faamaoopoopoina ai foi o fuafuaga faataatitia a le afio'aga, atoa ai ma le tuuina atu o ni faamatalaga e uiga i togotogo ma lona taua i le siosiomaga o le gataifale.

## **5.8 Ia aoina ma faatama'ia le Alamea**

### **Ootootoga**

O le alamea o se ituaiga o le aveau, ma e nofo i luga o le a'au. O lenei meaola, na te 'aina meaola nini ua ta'ua o polipe o loo fausiaina ai le amu. A oo ina faateleina lenei meaola o le alamea, o le a faapena ona latou faatama'iaina se vaega tele o le a'au ma avea ai o se tulaga pagatia, o le a feagai ma le tele o meaola o loo faalagolago i le a'au mo ofaga ma mea'ai. e le mafai ona faaumatia pe faaniniina lenei meaola i le sami aua e mafai e nei itutino ona faatupuina mai ai nisi alamea fou se'ia vagana lava ua aumaia i le pa'umatu ma faamagoina ai, pe tanumia foi.

### **Fuafuaga Faataatitia a le Afio'aga**

Ua faailoa mai e aumaga ma le autautai o le afio'aga, o le alamea o se tasi lea o faafitauli o loo iai i gataifale o Pu'apu'a, ma ua tuuina atu faa-fautuaga e le Komiti.

### **Fautuaga**

Ia aoina ma faaputuina e le afioaga le alamea pe a latou va'aia pe tau foi iai i taimi o fagotaga. Ia aumaia i uta nei meaola ma tanumia pe faamagoina ai. Sa fautuaina foi, ma faaali finagalo o Alii ma Faipule o Pu'apu'a, o le a taumafai e faia ni asiasiga faalua i le masina mo le Aumaga atoa, latou te aoina mai le alamea ma faatama'ia i uta.

### **Taimi Fautuaina**

Ia faaauuina le aoina o lenei meaola faalafua i taimi ma aso uma, pe a pasia le fono mulimuli ia Aperila 18, 1997, lenei auala e puipuia ai le siosiomaga ma ona tamaoiga o le gataifale.

### **Fuafuaga Faataatitia a le Ofisa o Faigafaiva**

O le faamalalamaga o ni fesili e faatatau i le fuafuaga o le aoina o le alamea. Sa faapupulaina ai i le Afio'aga e leai se polokalame a le Malo e totogi ai le aoina ma le faatama'ia o lenei meaola, ae vagana ai le fesoasoani mai o le Ofisa o Faigafaiva e ala atu i fautuaga mo auala e tineia ai le alamea.

## **5.9 Ia faateleina le Ava sa iai o le Afio'aga**

### **Otootoga**

Sa tuuina mai se faatalosaga a le Afio'aga i le Ofisa o Faigafaiva mo le faaleleia lea poo le faalateleina o se tasi o ava o loo avea ma ala-vaa o le aufaifaiva i tua'au mo fagotaga. Sa faaalua foi e le afio'aga le tulaga sa iai muamua leni ava, ae talu ai afa malolosi i le tausaga 1990 ma le 1991 ua toe punitia ai lea ava.

### **Fautuaga**

Sa fautuaina e le Ofisa o Faigafaiva i le fonotaga a le KFVL i le aso 3 o Aperila, le iloiloina pea e le afio'aga o le tulaga ua iai le faatalosaga ua tuuina mai mo le faateleina lea o le ava, ona o aafiaga e ono alia'e mai ai. O nisi o nei fuafuaga, e aofia ai le afaina o le aloalo pe a malosi mai le au mai tua'au. E le gata i lea, ae afai o iai ni meaai mo i'a laiti ma laau o loo ola i le aloalo mo le taimi nei, o le a toe tafua uma i tua'au pe afai ae toe faateleina le ava. O lona uiga, o le a afaina foi la le ola lelei o i'a ma figota i le aloalo. Sa faaalua foi i leni fautuaga e faapea, afai ae iai se finagalo o le afio'aga mo le faaauuina o lea fuafuaga, o le a faapea lava ona toe felogoai le Komiti ma le Ofisa o Faigafaiva i nisi o vaega mo le faataunuina o lea faamoemoe.

### **Fuafuaga Faataatitia a le Afio'aga**

Sa faaalua e sui o le Komiti i le fonotaga ma le KFVL le naunautaiga o le afio'aga mo le faalateleina o lea o le ava, ae peitai, afai ae le talafeagai ma suesuega a le Ofisa o Faigafaiva ona o nisi o mafuaaga tatau, ona taatia atu pea lea o leni mataupu i le afio'aga e faia iai se fuafuaga.

### **Fuafuaga Faataatitia a le Ofisa o Faigafaiva**

O le a fesoasoani le Ofisa o Faigafaiva mo le faatinoina o fuafuaga faataatitia a le afio'aga, atoa ai ma le felogoa'i pea ma le afio'aga i le mataituina pea o tulaga i le ava.

## **5.10 Faamatalaga e uiga i upega**

### **Otootoga**

O le talanoaina o upega i le fonotaga i le Aso 3 o Aperila, 1997, ma ua ioeina ai e le Komiti le faaogaina loa o le Tulafono Faatonutonu mo Faigafaiva 1996 e pei ona pasia e le Malo o Samoa i Sisifo ia Aperila i le tausaga e 1996 mo le vaega e pei ona taua i luga. O leni tulafono o loo aafia ai mata-upega fagota ma pa i'a e faatagaina. (Silasila i le Pepa o Faamatalaga 6).

### **Fautuaga**

Sa fautuaina e le komiti a le Afio'aga le Ofisa mo se fesoasoani i le FAU poo le manoa sa faaogaina e le afio'aga mo a latou faigafaiva sa masani ai i le vavau. Sa latou faaalua foi o le a gafa lava ma le afio'aga le faatupeina o lea faamoemoe. E le gata foi i lea, a ua faia foi se tulafono e faamamaluina ai lea tulaga.

### **Tulafono**

"Ua matua faasaina soo se isi ituaiga o upega i totonu o le afio'aga o Pu'apu'a sei vagana ai le upega o le vavau o le afio'aga o loo iai nei"

### **Fuafuaga Faataatitia a le Ofisa o Faigafaiva**

Sa fautuaina e le Ofisa o Faigafaiva le tulaga o loo iai nei tulaga i le faamalosiaina o le tulafono a le afio'aga atoa ai ma le lagolagosua mai a le Malo. Sa faaalua e sui o le Ofisa e faapea, e mafai lava ona faaauuina pea le tusia o le tulafono a le afio'aga i totonu o le latou Fuafuaga Tatau ae peitai, o lona faamalosiaina, o le a le maua mai ai se fesoasoani a

le malo. O le faatalosaga e uiga i le fau, o le a fesootea pea le Ofisa o Faigafaiva ma le Afio'aga i lea tulaga.

## **5.11 Tulafono faaopoopo a le Afio'aga**

### **Otootoga**

Ua iai nei se Tulafono Faatonutonu a le Ofisa o Faigafaiva i lalo o le Vaega 3 ma le 4 o le Tulafono Tau Faigafaiva 1998, e uiga i nisi o vaega taua e puipuia ai le tamaoaiga ma isi auala e faasaoina ai le Gataifale. O lenei foi tulafono, ua maea ona pasia aloaia e le Malo o Samoa i Sisifo ia Aperila, 1996, ma ua faamamaluina nei.

### **O nisi o vaega o loo aofia i lenei Tulafono, e pei :**

- Ogasami Faasaoina
- Lاپisi lafoai ma le faatafunaga o le Gataifale
- Faigafaiva le talafeagai
- Laiti Faatapulaaina mo I'a ma Figota

Ua le gata i lea, a ua iai nei se malosiaga faale-Malo e faamalosiā ai nei tulafono i totonu o afio'aga taitasi, pe afai ae malilie iai tagata o le afio'aga. E le gata foi i lea, a ua iai faasalaga ua uma foi ona aiaia mo le faamamaluina o nei tulafono.

### **Fuafuaga Faataatitia a le Afio'aga**

Ua faatalosagaina e le Komiti o le KFVL i le fonotaga i le Aso 3 o Aperila, 1997 le Ofisa o Faigafaiva ina ia avea tulafono ua aiaia e le Ofisa ma ua faamamaluina e le Malo, e avea ma tulafono mo le afio'aga. E le gata i lea, ae o le a taumafai foi le komiti e faamalosiā nei tulafono e pei o le laiti faatapulaaina o I'a ma Figota ma upega, ma pa i'a faatagaina i totonu o le afio'aga e ala atu lea i le fautuaina o le Pulega mamalu a Alii ma Faipule o Pu'apu'a.

### **Taimi Fautuaina**

O le a faamalosiā nei tulafono pe a maea ona pasia i le fonotaga mulimuli i le Aso 18 o Aperila 1997, e pasia ai lenei Fuafuaga Tatau a le afio'aga atoa ai ma le maea ona faasalalauina.

### **Fuafuaga Faataatitia a le Ofisa o Faigafaiva**

O le a fesoasoani le Ofisa o Faigafaiva mo le faatinoina o fuafuaga faataatitia a le afio'aga atoa ai ma le tapenaina o tulafono a le afio'aga ina ia faamalosiā faale-Malo ma ia faasalalauina mo le silafia e le atunuu.